



La Büvetta Tarasp es üna perdüta istorica dal turissem e'ls bogns da cura. Foto mad

## Maridar in ün stabilimaint istoric

La Pro Büvetta Tarasp voul investi ils prossems ons 18 milliuns

Annatina Filli/FMR

Da l'on 2025 dess gnir inaugurada la nouva Büvetta Tarasp. A chaschun da la radunanza generala da la Società Pro Büvetta Tarasp ha preschantà il manader da proget las novas davart la renovaziun dal edifiz. Las investi-ziuns s'amuntaran a bundant 18 milliuns francs. La Büvetta Tarasp, situada a la riva da l'En, es üna perdüta istorica dal turissem e'ls bogns da cura. Daspö ons es il stabilimaint na accessibel e periclità da crodar in muschna. Ün ulteriur privel chi imnatscha la büvetta es il grip instabil sur l'edifiz. La Società Pro Büvetta ha invidà d'incuort a seis commembers a la radunanza generala, ingon in möd virtual.

### La Büvetta Carola vain integrada

Daspö l'on 2012 s'ingascha la Pro Büvetta Tarasp pella sanaziun da l'edifiz a Nairs. Quella vain presidiada da l'architect

*Werner Reichle*

dad Uster e Sent. Daspö gün da l'on passà es

*Christian Müller*

il nouv manader da proget. L'architect da Turich ha infuormà davart l'andamaint da la planisaziun per la renovaziun da la Büvetta. «Per trar a nüz sinergias vaina integrà i'l proget eir la renovaziun da la Büvetta Carola chi'd es situada pac toc davent», ha dit Christian Müller. Las sfidas dal proget saran la finanziaziun e co sgürar il grip instabil sur l'edifiz. «Qua cha la Büvetta Tarasp sta suot chüra da monumaints survain il cumün da Scuol subvenziuns per sgürar il grip», ha manzunà Christian Fanzun, il capo cumünal da Scuol.

### Plüssas sportas

L'intent da la società Pro Büvetta es da spordscher üna gestiun da tuot on illas localitats da la uschenomnada «perla architectonica». «I dà la part istorica culla gronda halla e dà la vart ost üna part chi'd es gnüda fabrichada pro plü tard», uschè Christian Müller. El ha preschantà diversas propostas co chi's pudess trar a nüz las localitats. «Illa gronda halla as pudessa organisar bellas tavolatas o i's pudess tilla metter a disposiziun per bankets o per nozzas.» Plünavant es il perit da Turich persvas chi fetscha da-bsögn da plüssas sportas sco per exaimpel localitats per seminars o la vendita d'aua minerala. Eir üna collavuraziun culla Fundaziun Nairs in tscherts segmains füss pussibla. Illa Büvetta Tarasp sbuorflan las funtanas da Lucius ed Emerita, las duos auas las plü ferm mineralisadas da l'Engiadina Bassa.

### Inauguraziun insembel cul giubileum

Dal 1875–76 ha l'architect Bernhard Simon realisà a Nairs la Büvetta Tarasp. Chi dà illa regiun funtanas mineralas es gnü descrit fingià dal 1369. Affarists regiunals han lura gnü plü tard l'idea da commercialisar l'aua e da fabrichar inchaschs. Da l'on 1860 es gnüda fundada la società «Tarasp-Schulser-Gesellschaft» chi vaiva decis da fabrichar l'hotel a Nairs. La prüma Büvetta es gnüda fabrichada in möd simpel dal 1840 e dal 1875 la Büvetta sco ch'ella as preschainta hoz. Ils cuosts per la renovaziun da las duos büvettas s'amuntan a bundant 18 milliuns francs. Da quels sun la mità subvenziunats. «Pels var 10 milliuns restants staina ir in tschercha da donaturs sco fundaziuns o investurs. Nus vain fingià l'ün o l'oter investur chi ha demuossà interess per nos proget», ha dit Christian Müller. Ils respunsabels speran da pudair inaugurar la nouva Büvetta da l'on 2025, «insembel cul giubileum da 150 ons da tala.»